

Uunga siunnersuut: Qalerallit aalisakkallu allat akitsuutaat pillugit Inatsisartut inatsisaata allangortinneqarnerannik Inatsisartut inatsisaat**Saqqummiussissut**

(Aningaasaqarnermut Akileraartarnermullu Naalakkersuisoq)

Siullermeerinnineq

Naalakkersuisut sinnerlugit matumuuna Qalerallit aalisakkallu allat akitsuutaat pillugit Inatsisartut inatsisaata allangortinneqarnerannik Inatsisartut inatsisaattut siunnersuut saqqummiuppara.

Kalaallit Nunatta imartaani avaleraasartoornerup soqutigineqarnerata annertusarnissaa siunertaralugu, maanna avaleraasartuunut akitsuutip allangortinnissaa siunnersuutigineqarpoq. Soqutiginninneruneq ilaatigut siunissami nunatta ataatsimut avaleraasartoortassanit ataavartumik pisassanik amerlanerusunik piumasaqarsinnaaneranut ilapittuissaaq.

Aalisariutit Kalaallit Nunatsinni angerlarsimaffeqartut atorlugit avaleraasartoortanut akitsuut 0,55 kr-inik apparlugu, akitsuutip kiilumut 0,40 kr-inngortinneqarnissaa siunnersuutigineqarpoq, aalisariutillu Qallunaat Nunaanni, Savalimmiuni nunaniluunniit allani angerlarsimaffilittut nalunaarsorsimasut avaleraasartoortaannut akitsuut 0,50 kr-inik apparlugu kiilumut 1,00 kr-inngornissaa siunnersuutigineqarpoq.

Akitsuutinik appaaneq aalisarnikkut annertunerusumik ingerlatsinerumut kiisalu Kalaallit Nunatsinni aalisakkanik ikerinnarsiortunik aalisarnermik ineriartortitsinissamut atatillugu aningaasagissaarnerulernissamut ilapittuisussatut ilimagineqarpoq.

Avaleraasartoortanut akitsuummik appaaneq missingersuutinut sunniuteqassanngitsutut ilimagineqarpoq.

Naggataagut inatsisissatut siunnersuummut taassumalu nassuiaataanut innersuutissavassi.

Taama oqaaseqarlunga Naalakkersuisut sinnerlugit siunnersuut Inatsisartunut kingornalu Aningaasaqarnermut Akileraartarnermullu Ataatsimiititaliami suliarineqareernerani aappasaaneerlugu suliarineqarnissaa siunertaralugu suliassanngortippara.